

M009: Pfaffe Lambrecht: 'Alexanderlied' (V ['Vorauer Alexander'])

- 0,1 diz liet daz wir hier wûrken .
0,2 daz sulet ir rehte merken .
0,3 sîn gevuoge ist vile reht .
0,4 iz tihte der pfaffe Lambrecht .
0,5 er tæte uns gerne ze mære .
0,6 wer Alexander wære .
0,7 Alexander was ein wîse man .
0,8 vile manic rîche er gewan .
0,9 er zerstôrte vile manic lant .
0,10 Philippus was sîn vater genant .
0,11 diz müget ir wole hoeren .
0,12 in libro Machabêorum .
0,13 Alberîch von Bisinzo .
0,14 der brâhte uns diz liet zuo .
0,15 er hête ez in walhischen getihtet .
0,16 nû sol ich es iuch in diutischen berihten .
0,17 nieman en schulde sîn mich .
0,18 louc er sô liuge ich .
0,19 dô Alberîch diz liet entsluoc .
0,20 dô hête er ein Salomones buoch .
0,21 dâ er ane sach .
0,22 vanitatum vanitas .
0,23 daz ist allez ein îtelheit .
0,24 daz diu sunne umbegeit .
0,25 daz hête Salomon wole versuoht .
0,26 dâr umbe swar in sîn muot .
0,27 er ne wolte niht langer ledic sitzen .
0,28 er schreip von grôzen witzen .
0,29 wande des mannes müezicheit .
0,30 ze dem lîbe noch ze der sêle niht versteit .
0,31 dâr ane gedâhte Alberîch .
0,32 den selben gedanc hân ich .
0,33 und ich ne wile [mich] [niwet] [langer] [sparen] .
0,34 [des] [liedes] [wile] ich volvarn .
0,35 rîcher künige was genuoc .
0,36 daz ne saget uns nechein buoch .

0,37 noch necheiner slahte mære .
0,38 daz decheiner sô rîche wære .
0,39 der in alten zîten .
0,40 mit sturme oder mit strîte .
0,41 ie sô manic lant gewünne .
0,42 oder sô manigen küninc bedwünge
0,43 herzogen erslüege
0,44 unde andern vürsten genuoge .
0,45 sô der wunderlîche Alexander .
0,46 ime ne gelîchet nechein ander .
0,47 der von Kriechen was geboren .
0,48 unde wart dâ ze einem künige erkoren .
0,49 unde was der allerêrste man .
0,50 den ie Kriechlant ze künige gewan .
0,51 iz wâren ouch künige kreftic .
0,52 über manic diet gewaltic .
0,53 vile michel was ire sælicheit .
0,54 ire list unde ire kündicheit
0,55 ire schatz der was vile grôz .
0,56 der ne wart nie necheiner sîn genôz .
0,57 der mit listen oder mit mehten .
0,58 sînen willen ie sô volbrâhte .
0,59 sô der selbe . man .
0,60 umbe den ich es began .
0,61 diser rede wile ich mich ervaren .
0,62 Salemon der was ûz getân .
0,63 der sich ûz allen künigen nam .
0,64 dô diu vrouwe regina austri zuo ime kom .
0,65 unde si sînen hov gesach .
0,66 mit rehter wârheit si sprach .
0,67 daz von mannes gebürte .
0,68 nie sô vrumer küninc würde .
0,69 man muoste in wole ûz scheiden .
0,70 wande Alexander was ein heiden .
0,71 nû sprechent boese lügenære .
0,72 daz er eines goukelæres sun wære .
0,73 di ez iemer gesagent .
0,74 di liegent alsô boese zagen .
0,75 oder di es ie gedâhten .
0,76 er was rehter keiser slahte .
0,77 niemer geloube ez nechein vrum man .
0,78 sînen vater ich wole genennen kan .
0,79 sîn geslehte daz was hêrlich
0,80 über al Kriechen was er gewaltic .
0,81 Philippus hiez der vater sîn .
0,82 al Mazedônen lant was sîn .
0,83 sîn ane was ein guot kneht
0,84 über al daz mer gie sîn reht .

0,85 er truoc eine tugentlîche maht .
0,86 â wî wie manic volcwîc er vaht .
0,87 wider den küninc Xersen .
0,88 harte ellenthafte überwant er den .
0,89 Philippus nam ime ein wîp .
0,90 si truoc einen vrümiclîchen lîp .
0,91 ich sage iu wie ire name was .
0,92 si hiez diu schoene Olympias .
0,93 daz was Alexanders muoter .
0,94 diu vrouwe hête einen bruoder .
0,95 der was ouch Alexander genant .
0,96 ze Perse hête er daz lant .
0,97 der was ein vürste alsô getân .
0,98 er ne wolte necheinem künige wesen undertân .
0,99 er ne wolte ouch nie . ûz necheineme sturme gevlihen .
0,100 swie ime sîniu dinc dâ ergiengen .
0,101 er was ein tiurlich degen .
0,102 unde [wolte] ouch rehter hêrschefte pflegen .
0,103 nû wile ich iu von Alexanderes sagen gebürte .
0,104 wie si alhier zuo wurde .
0,105 sîn muoter vrouwe Olympias .
0,106 ze den stunten dô siu sîn genas .
0,107 dô wart ir ein vile michel nôttval .
0,108 diu erde erbibete überal .
0,109 dâ was der doner vile grôz .
0,110 â wie starke daz weter ane gôz .
0,111 der himel der wandelete sich .
0,112 und der sunne vertunkelete sich .
0,113 er hête vile nâch sînen schîmen verloren .
0,114 dô Alexander wart geboren .
0,115 nû ne vereischete ich êr noch sint .
0,116 alsus geboren nechein kint .
0,117 geloubet mir des ich iu sage .
0,118 der dêch baz in drîn tagen .
0,119 danne al ander kint .
0,120 sô si drîer mânôde alt sint .
0,121 und alsô ime ieht geschach .
0,122 daz ime übel ze hoeren was .
0,123 sô sach er alsô der wo[l]v tuot .
0,124 sô er obe sîneme ezzene stêt .
0,125 daz ich iu von ime sage daz ist wâr .
0,126 strûp unde rôtt . was ime sîn hâr .
0,127 nâch eineme vische getân
0,128 den man in dem mere mac vâhen .
0,129 ez was ime ze mâzen dicke .
0,130 krispe alsô lewen locke .
0,131 umbe sîn gesiune wile ich iuch bereiten .
0,132 ein ouge daz was weitîn .

0,133 getân nâch eineme trachen .
0,134 daz kom von den sachen .
0,135 dô in sîn muoter bestuont ze tragene
0,136 dô kômen ir vreisliche bilede zegegene .
0,137 daz [was] ein vile michel wunder
0,138 swarz was ime daz ander .
0,139 nâch eineme grîfen getân
0,140 alsus sagent die in ie gesâhen .
0,141 sîn hals was ime wole geschaffen .
0,142 sîn brust was ime wole offen .
0,143 sîn arme wâren ime vone grôzer maht .
0,144 alles sînes muotes was er wole bedâht .
0,145 sîn bûch ne was ime ze lanc noch ze breit .
0,146 â wie wole dem jungelinge daz stêt .
0,147 schoene er ze tale wert schein
0,148 beidiu über vuoz . und über bein .
0,149 und über allen sînen lîp .
0,150 sô was er alsô êrlich .
0,151 daz sage ich iu ze wâre .
0,152 in sînem êrstem jâre .
0,153 sô wuohs ime maht und sin .
0,154 mêre denne einem anderen [in] drîn .
0,155 nû vernemet wie sich Alexander vûre nam
0,156 swâ sô ein vrûmic rîtær zuoze ime kom .
0,157 dem bôt er lîp und guot .
0,158 er ne kêrte keinen sînen muot
0,159 weder an kint noch an tumben man .
0,160 â wie wole den hêren daz gezam .
0,161 ime was ouch sîn gebære .
0,162 als er ein vûrste von allen landen wære .
0,163 die meister die Alexander ouch gewan .
0,164 si wâren wole gerechte man .
0,165 si begunden in wîsheit lêren .
0,166 und zugen in zuo grôzen êren .
0,167 si lêrten [in] sturm unde volcwîc .
0,168 sô des nie wart gelîch .
0,169 der liste der er dannen gewan .
0,170 des wart [er] ein vrumer man .
0,171 der êrste meister sîn .
0,172 der lêrte in kriecheische unde latîn .
0,173 und buochstabe setzen an eineme permente .
0,174 noch dô was er ein lûtzel kint .
0,175 und lêrte in vile manic buoch .
0,176 und ander wîsheit genuoc .
0,177 der ander meister den er gewan .
0,178 der lêrte in wole musicam .
0,179 und lêrte in seiten ziehen .
0,180 daz alle doene dâr in giengen .

0,181 rotten und ouch der lîren klanc .
0,182 und von ime selben heben daz gesanc .
0,183 der dritte vrumete ime harte wole .
0,184 er lêrte in alle wîsheit .
0,185 wie verre der sunne von der mânen gêt .
0,186 und lêrte in ouch den list .
0,187 wie hôch von dem wazzer ze dem himele ist .
0,188 der vierde meister den er gewan .
0,189 daz was Aristoteles der wîse man .
0,190 er lêrte in al die kûndicheit .
0,191 wie der himel umbe gêt
0,192 und stach ime die liste in sînen gedanc .
0,193 ze erkennen daz gestirne und ouch sînen ganc .
0,194 dâ sich die verjen mit bewarent .
0,195 dâ si in dem tiefen mere varnt .
0,196 ein meister gewan sint .
0,197 Alexander daz edele kint .
0,198 der lêrte in mit gewæfene varen .
0,199 und wie er sich mit eineme schilte solte bewarn .
0,200 und wie er sîn spere solte tragen .
0,201 ze dem dem er wolte schaden .
0,202 und wie er den erkiesen mahte
0,203 und gestechen sô daz tohte .
0,204 und alsô der stich wære getân .
0,205 sô lêrte er in zuo dem swerte vâhen .
0,206 und dâ mit kûndiclichen slahen .
0,207 und lêrte in wie er sich solte bewarn .
0,208 vore deme der ime wolte schaden .
0,209 und wie er sînen vîanden lâgen solte .
0,210 die er dâ dwingen wolte .
0,211 und wie er ze den rîtæren solte gebârn .
0,212 umbe daz daz si ime willic wæren .
0,213 der êrste bestuont in mit witzen .
0,214 und lêrte in ze dinge sitzen .
0,215 und lêrte in wie er daz bedâhte
0,216 daz er von deme unrehte beschiede daz rehte .
0,217 und wie er lantrecht bescheiden kunde .
0,218 allen den [es] er gonde .
0,219 umbe diz und umbe manic ander .
0,220 alsus wart daz kint Alexander
0,221 beide listic und gewaltic und balt
0,222 dô allrêreste was er zweliv jâr alt
0,223 alsô stætic was ime sîn muot .
0,224 umbe al wertlich guot .
0,225 sô wolte er nie nieht geliegen .
0,226 noch sich vone keiner wârheit geziehen
0,227 â wie wole einem sînem meister daz erschein .
0,228 er stiez in ze tal [über] einem steine .

0,229 daz ime sîn hals enzwei brast .
0,230 wande er ime ein lüge zuo sprach .
0,231 nû sprechent boese lügenære
0,232 daz der sîn vater wære .
0,233 â wie übele ich daz gelouben mac
0,234 wande er ime sîn hals enzwei brach .
0,235 von Philippus stuote wile ich iu sagen .
0,236 dâr under wart ein ros getragen .
0,237 daz was wunderlich .
0,238 iz was irre und strîtlic .
0,239 snel und ernesthaft .
0,240 von sîner gescheffede joch von sîner kraft .
0,241 der munt was ime alsô einem esele getân .
0,242 sîn ôren wâren ime vile lanc .
0,243 daz houbet mager und swanc .
0,244 sîn ougen wâren ime al der varwe .
0,245 alsô eineme vliegenden arne .
0,246 sîn hals was ime lockeht .
0,247 ich wæne ez wære lewen geslehete .
0,248 ûf den goffen habete iz rinderhâr .
0,249 an sînen sîten lêbartes mâl .
0,250 sô Sarrazîn noch kristenman .
0,251 nechein bezzer ros gewan .
0,252 daz ros wart mit îserne gebunden .
0,253 alsô daz dâ tobete ze allen stunten .
0,254 und wart vüre den küninc Philippus geleit .
0,255 und alsô er vernam sîn gelegenheit .
0,256 Buzival hiez er ez namen .
0,257 daz dûhte siu guot allesamet .
0,258 man hiez daz ros in einen marstal tuon .
0,259 daz si dâ vore mahten geruowen .
0,260 zuo dem rosse getorste nieman gên
0,261 wan umbe den ez alsô was getân .
0,262 den verteilet was daz leben .
0,263 den muose man dem rosse geben .
0,264 dem künige wart ein bote gesant .
0,265 von dem den daz ros was kunt .
0,266 und hiez ez baz bewaren .
0,267 er sprach man solte ez noch an ime ervaren .
0,268 wem des küniges gewalt
0,269 nâch sînem lîbe würde versalt .
0,270 er sprach “daz sol dem . der ez allrêreste beschrîte .
0,271 wan diz nie kein man ne gerite .”
0,272 und alsô Alexander heim kom .
0,273 algeriht er daz vernam .
0,274 wîs was er ze unmâzen .
0,275 dô allrêreste hête er sînen meister verlâzen .
0,276 des umbe daz ros was geseit .

0,277 des enthabete er noch dô vernomen niht .
0,278 eines tages alsô er ûfen der pfalenze gêt .
0,279 geste habeten in dâr geleitet .
0,280 dô hôte er daz ros weien .
0,281 daz stuont in sîner tobeheit schriene .
0,282 Alexander sprach ze den kunden .
0,283 die mit ime über die pfalenze giengen .
0,284 "ich ne weiz waz mir schillet in daz ôre .
0,285 ez ne lât mich niht gehoeren .
0,286 ich ne weiz weder ez ein ros oder ein lewe teit .
0,287 wan ez dâ in beslozen stêt ."
0,288 Ptolomeus sprach zuo dem kinde .
0,289 "hêrre ist Buzival ein ros vile swinde .
0,290 daz hât iuwer vater in getân .
0,291 under der stuot ne mohte nechein bezzer gegên ."
0,292 er sprach hêrre ez ne hât nechein marschalch in huote .
0,293 wande ez erbîzet übele und guote .
0,294 und diz Alexander vernam .
0,295 niht er ne beite . êr er zuo dem rosse kom .
0,296 er rief den kinden .
0,297 und hiez ime den slüzzel gewinnen .
0,298 ir necheiner getorste daz ros dâ vüre ziehen .
0,299 wande sie alle vile ungerne dâr in giengen .
0,300 Alexander erzurnete daz .
0,301 die türe er nider brach .
0,302 er hiez sie alle abe stân .
0,303 er wolte aleine dâr in gân .
0,304 alsô Buzival gegen im ûz wolte varn .
0,305 und ez Alexander ane begunde starn .
0,306 ez erblûcte sich aller sîner maht .
0,307 und wolte ime wesen dienesthaft .
0,308 ez kniewete vüre ime dâr nider .
0,309 ez ne geruorte sich ouch niemer sider .
0,310 alsô kündiclich was dem rosse al sîn gebâr
0,311 alsô ez des kindes wole gewone wære .
0,312 Alexander begunde dô streichen .
0,313 ein ros daz nie nechein man begunde weichen .
0,314 sô dâr nie seil noch zoum ane kom .
0,315 mit der mâne er ez nam .
0,316 er habete ellenthaften gedanc .
0,317 ûfen sînen rügge er ime spranc .
0,318 ûzer deme gademe er ez reit .
0,319 daz was ein michel baltheit .
0,320 ein bote îlte dem künige daz sagen .
0,321 er ne getorste ez niht verdagen .
0,322 waz sîn sun hête getân .
0,323 ûf spranc der küninc sâ .
0,324 und zôch sînes sinnes .

0,325 dô vröuwete er sich sînes kindes .
0,326 und alsô Alexander [dazz] vernam .
0,327 er tet alsô im wole gezam .
0,328 er warf sich nider
0,329 unde gienc sîneme vater gegene .
0,330 und alsô si zesamene komen .
0,331 mit handen si sich namen .
0,332 ire rede was vile minnensam .
0,333 alsô ir hier müget verstân .
0,334 "heil dich" sprach Philippus "sun mîn .
0,335 mich dunket dû solt küninc sîn .
0,336 der gewalt . sî dir vile gereit .
0,337 alsô wît sô mîn rîche gêt ."
0,338 "heil iuch" sprach Alexander "vater mîn ."
0,339 got lâze iuch iemer sælic sîn .
0,340 alles guotes ich iu vile wole getrûwe .
0,341 vile lange müezet ir iuwer rîche mit genâden bûwen .
0,342 er quot "vater nû bin ich vûnvzên jâr alt .
0,343 daz haben ich rehte gezalt .
0,344 und bin alsô komen ze mînen tagen .
0,345 daz ich wole wâfen mac tragen .
0,346 und swer eigen tugent iemer sol gewinnen .
0,347 der sal sîn in sîner jugende beginnen .
0,348 und êr sehe er sich schuldic
0,349 nieht versûme er sich ."
0,350 der küninc er ne wolte es niwiht beiten .
0,351 er hiez daz kint bereiten .
0,352 waz mage ich iu sundere gesagen
0,353 er tet ime wâfen vûre tragen .
0,354 sô man si under eines küninges gesinden .
0,355 allerbezzest kunde vinden .
0,356 und widerküre es Alexander .
0,357 man gewünne ime ein ander .
0,358 und alsô daz kint nâch dem site .
0,359 was wole gewâfen und geriten .
0,360 dô was er ein schoener jungelinc .
0,361 si gruozen in alsô ein küninc
0,362 er sprach wâ si des gedæhten .
0,363 daz si im eines küninges namen an leiten .
0,364 al die wîl alsô er sô vile künincrîches niuht hête .
0,365 dâ er sînen vinger ûf geleite .
0,366 er sprach "woltet ir eine wîle geriuwen
0,367 unze ich eine tugent . mahte getuon .
0,368 an einem künige wile ich es beginnen .
0,369 und mac ich den überwinden .
0,370 daz ich dem die krône abe ziehe .
0,371 und ûz dem velde tuon gevliehen .
0,372 sô müget ir mir küninges namen geben .

0,373 alsô lange sô ich iemer gelebe ."
0,374 ein küninc was Nicolaus genant .
0,375 Alexander vuor in sîn lant .
0,376 Caesaream vüre die grôzen stat .
0,377 dâ wart der rîche küninc entsazt .
0,378 Alexander vaht ime den sige abe .
0,379 er vuorte die korône mit ime danne .
0,380 und alsô er dô wider heim gesan
0,381 ein leiht niumære er im vernam .
0,382 sîn vater habete sich sîner muoter geloubet .
0,383 und saz in voller brûtloufte .
0,384 er liez die sîne muoter
0,385 die vrouwen diu hiez Kleôpatra .
0,386 alsô Alexander heim kom .
0,387 er gienc vüre sînen vater stên .
0,388 und nam die korône die er mitsament ime dâ hête .
0,389 sînem vater er si ûf satzte .
0,390 er sprach "vater nement ditz mit minnen .
0,391 daz ich mit sturme hân gewonnen .
0,392 unze ich es baz mac getuon .
0,393 des habet ir êre unde ruom .
0,394 wan eines dinges trage ich iuch übelen muot .
0,395 daz tunket mich ze niuhte guot .
0,396 daz ir mîne muoter liezet iuwers willen .
0,397 und habet ein überhuor gestellet .
0,398 der rede wile ich nû gedagen .
0,399 iuwer ezzen wile ich niwiht versagen .
0,400 nû wêwen sô mir dei ougen dâ ich mit gesehe .
0,401 ich gedanke sîn allen den hier in .
0,402 die disen rât habent gevrumet .
0,403 daz er niemer ze êren kumet ."
0,404 ein rîtær hiez Lysias .
0,405 der stolz und redehaft was .
0,406 dem was daz vile ungemach .
0,407 daz daz kint sô verre sprach .
0,408 und entwurte im ein smâchheit .
0,409 alsô dicke der stolze man tuot .
0,410 dô hête der küninc einen napf swæren .
0,411 dâ an stuonden güldîne blachemâle .
0,412 den habete Alexander ûf der hende .
0,413 und sluoc in Lysian vüre die zende .
0,414 daz si im in sîne kelen risen .
0,415 er sprach "lâ dû dîn rede wesen ."
0,416 der küninc ûf von der taveln spranc .
0,417 wande in sîn zorn dwanc .
0,418 wan ime der strît niwiht wole geviel .
0,419 dô trat er vore unde viel .
0,420 daz ime sîn schenkel zerbrast .

0,421 und daz er âne tugent lac .
0,422 und alsô der küninc dâr nider viel .
0,423 Alexander sîn bluot wiel .
0,424 sîn zorn in dâr zuo truoc .
0,425 daz er mit dem swerte her umbe sluoc .
0,426 und swer dâ wider wolte stân .
0,427 der ne mohte ime mit dem lebene nicht entgân .
0,428 ich ne vereichte nie den der vernæme
0,429 wâr diu brût ie bekome .
0,430 Alexander gemâzete sich es dô .
0,431 und gienc sînem vater zuo .
0,432 und tete ime heil sîn bein .
0,433 und brâhte in und sîne muoter in ein .
0,434 unde alsô daz was geendet .
0,435 dô wart ein bote gesendet .
0,436 und sagete Philippus daz .
0,437 daz er bewaren hieze baz .
0,438 sîne burc ze Antonia .
0,439 und vüere dâr mit her
0,440 und næme die burc in sîne gewalt .
0,441 dâ wæren die rede manicvalt .
0,442 ez wære der sezmanne wille .
0,443 daz redeten sie under in stille .
0,444 wie si sich von ime gezügen .
0,445 und in lasterliche betrügen .
0,446 und si sich an dem besaten .
0,447 der die burc vore im behâte .
0,448 unde alsô der küninc diz vernam .
0,449 harte sêre er sîn erkom .
0,450 er wolte es niht langer bîten .
0,451 den sun hiez er dar rîten .
0,452 Alexander sich besante .
0,453 wie stolzlich er dar rante .
0,454 helde volc gieng ime nâch .
0,455 vûinv werbe zehenzic .
0,456 einen sturm tet er mit listen .
0,457 und gewan die selben veste .
0,458 vile vroeliche er widere ze lande kom .
0,459 daz er necheinen schaden hette genomen .
0,460 nû vernement waz ich iu hier zele .
0,461 vore dem künige in dem sale .
0,462 dâ vant er boten Daris
0,463 eines gewaltigen küniges .
0,464 der den zins von sînem vater Philippus wolte entwâhen .
0,465 wande er Dariô was undertân .
0,466 diz was Dariôs . der in Daniel stêt .
0,467 der mit dem kriechischen künige streit .
0,468 diz was den Daniel slâfente gesach .

0,469 in einem troume dâ er lac .
0,470 dâ sach er vehten einen boc und einen wider .
0,471 daz bezeichent die zwêne künige sider .
0,472 daz Philippus den zins galt .
0,473 in Daris gewalt .
0,474 dannen über manigen tac .
0,475 daz was dem sune ungemach .
0,476 Darius er wart umbe den selben zins erslagen .
0,477 daz ich iu sol wâre sagen .
0,478 Alexander spranc ûf algeriht .
0,479 zuo der boten gesiht
0,480 des zinses er niwihlt galt .
0,481 ire hêren er boeslich schalt
0,482 er sprach "iuwer hêre ne hât anderes necheine vrûmicheit .
0,483 wan daz er schatz über einander leit .
0,484 er was ein harte tump man .
0,485 daz er zinses an uns gesan .
0,486 er ne wirt ime niemer gesant .
0,487 hinnen ûzer Kriechlant .
0,488 bî mînen zîten"
0,489 die boten hiez er rîten .
0,490 êr si erstürben an der stunt
0,491 daz si ez ire hêren tæten kunt .
0,492 alsô lange sô er des zinses niwihlt wolten entbern .
0,493 er solte in sîn dâ heime wern .
0,494 mit alsô getâner mâze .
0,495 er solte ime sîn houbet lâzen .
0,496 diz entbôt er ime alsô .
0,497 des wâren die boten riuwic und vrô .
0,498 si wârn vile vrô daz si des lîbes genâsen .
0,499 und wâren harte riuwic daz er ire hêren wolte vertwâsen .
0,500 unde alsô diz wart geendet .
0,501 dô wart ein bote gesendet .
0,502 und sagete Philippus waz man redete .
0,503 von einer sîner undertâner diet .
0,504 von sînem manne ze Thelemone .
0,505 daz si im unrehte wolten lôn .
0,506 der triuwen der er mit in habete begangen .
0,507 si hêten . ze ein anderen gevangen .
0,508 und wolten unmâze wider in stellen .
0,509 Alexander nam sîne gesellen .
0,510 vrûmiclîchen er dâr reit
0,511 alsô dicke der stolze man teit .
0,512 in die burc er gienc
0,513 den burcgrâven er dâr ûfe vienc .
0,514 die boesen er dâr abe stiez .
0,515 die [sînen] er dâr ûf liez .
0,516 und nam ire schatz und gewant .

0,517 und allez daz er dâ vant .
0,518 und lêhente alle sîne man .
0,519 mit dem daz er dâ gewan .
0,520 und alsô er dô widerreit .
0,521 dô begagenete ime eine mêrer arbeit .
0,522 dâ widerreit . ime Pausonias .
0,523 der ein rîcher marcgrâve was .
0,524 und vuorte die kûninginne in sîne gewalt .
0,525 â wie sêre er es dâ zestete entgalt .
0,526 daz was diu schoene Olympias
0,527 diu Alexanders muoter was .
0,528 sînen vater lie er tôtwunt .
0,529 daz wart ime dâ getân rehte kunt .
0,530 Alexander was ein helt vrûmiclich .
0,531 den schilt zuhte er vûre sich .
0,532 und als er ime was wole genâhet .
0,533 ûf rihte er sînen schaft .
0,534 sprangte dâ er Pausoniam gesach .
0,535 durch sînen bûch . er stach .
0,536 zuo der erde er in warf .
0,537 er sprach "des stiefvaters ich niuht bedarf ."
0,538 Alexander sprach zuo den gesinden .
0,539 und hiez den marcgrâven ûf binden .
0,540 er vuorte in lebentigen in sîn lant .
0,541 â wie siech er sînen vater vant .
0,542 der wunden er niuht genas .
0,543 die ime sluoc Pausonias .
0,544 alsô Alexander heim kom .
0,545 er gienc vûre sînen vater stân
0,546 er sprach "vater wile dû iuwet sprechen .
0,547 dû maht dich heizen rechen ."
0,548 er sprach "sun dû heiz in slahen ."
0,549 daz was vile schiere getân .
0,550 dâr nâch über unmanigen tac .
0,551 Philippus dâ tôt lac .
0,552 unde alsô Philippus was begraben .
0,553 dô wart Alexander ze kûninge erhaben .
0,554 starke wuohs ime sîn gewalt .
0,555 dô allrêreste was er zweinzic jâre alt .
0,556 daz [er] mit listen und mit mehten .
0,557 sîn rîche wole berihten mohte .
0,558 ich sage iu wie er es began .
0,559 er nam sîn allergetriuwesten manne .
0,560 die ime ze sîner noete .
0,561 ie wâren einmuote .
0,562 er sprach "hêre . wir ne haben niuht ze bîtene
0,563 wir müezen her leiten .
0,564 Kriechlande ze êren .

0,565 dâr an gedenkent hêrre .
0,566 daz man ie über unser lant .
0,567 die allertiureste künige vant .
0,568 des lâzen wir die entgelten .
0,569 die . uns den zins hiezen gelten .
0,570 hundert [jâr] unde mêre .
0,571 daz in ze laster ergê .
0,572 daz wir des zinses werden lôs
0,573 swer dâ wile snellez ros .
0,574 beidiu wâfen unde gewaht .
0,575 des tuon ich ime alles guoten rât .
0,576 âne alle sîne arbeit .
0,577 swer noch mit mir bestêt .
0,578 deme teile ich lîp unde guot .
0,579 unde trage ime iemer willigen muot .”
0,580 unde alsô er diz gesagete .
0,581 ir nechein langer dagete .
0,582 si sprâchen alle mit einer zungen .
0,583 “got behüete uns disen küninc jungen .
0,584 daz er mit genâden vile lange müeze leben in sînem rîche .
0,585 sô wê dem der ime gewîche .”
0,586 er hiez dô gebieten herevart .
0,587 alsô im dâ gerâten wart .
0,588 dâr zuo was ime vile liebe .
0,589 er sante boten unde brieve .
0,590 ze Kriechen unde ze Mazedôn .
0,591 den bôt er den starken lôn .
0,592 ze Kalabre er entbôt .
0,593 daz si im hülffen zuo der nôt .
0,594 ein stat heizet Nicomedias .
0,595 dâ sancte Pantaleon gemarteret was .
0,596 die vuoren sîne hervart . mit manigem helede .
0,597 tûsent brâhten sie ime ze helfe .
0,598 dô hiez er über lant gebieten
0,599 mit drô joch mit miete .
0,600 daz si ime ze helfen komen .
0,601 alsô sie sîne noete vernâmen .
0,602 unde swem daz versmâhte
0,603 daz er sîn houbet verloren hête .
0,604 vile êrhafte er sîn geræte schuof .
0,605 des tages dô er sich ûz huop .
0,606 sibenzic tûsent was sînes hers .
0,607 daz schiffete er über ein ende des mers .
0,608 unde hiez den zins dâ entwâhen .
0,609 daz was wider Dariô getân .
0,610 er vuor dannen in Sizilienlant .
0,611 unde verwaltigete alle die er dâ vant .
0,612 unde tete sie swerjen herevart .

0,613 daz sîn vater nie erwarp .
0,614 alsus mêrete er sîn her .
0,615 unde schiffete sich dâ über mere .
0,616 und vuor ze tale wart .
0,617 unde verlie sich an die scharpfen swert .
0,618 unde alsô die Rômere daz vernâmen .
0,619 â wie êrhafte sie ime zegegene komen .
0,620 si brâhten ime ze der stunte .
0,621 silbers hundert tûsent pfunt .
0,622 unde einen mandel alsô edele .
0,623 sô küninc under diseme himele .
0,624 von pfellel noch von gimme .
0,625 nie necheinen mohte gewinnen .
0,626 unde eine korône diu was al rôtgolt .
0,627 alsus macheten si in den küninc holt .
0,628 diu gâbe was ime dancnæme .
0,629 des lobete er die guoten Rômære .
0,630 zehen hundert er mit ime nam .
0,631 dô er von Rôme dâr kom .
0,632 unde vuor zuo Africa .
0,633 der Darios undertâne .
0,634 mit gewalte reit er dâ durch .
0,635 ze Karthagine in die burc .
0,636 die burgere tâten ime die sicherheit .
0,637 vile lützel ir mit reit .
0,638 wande si in unmuote wâren .
0,639 wider Rômære die mæren .
0,640 dannen wurden sîne boten gesant .
0,641 über al Meridienlant .
0,642 dannen in Bethaniam .
0,643 unde dannen in Galatiam .
0,644 Kartanensen er entbôt .
0,645 si ne komen unde würden undertân .
0,646 er hiez si alle an daz kriuze slahen .
0,647 unde alsô si daz vernâmen .
0,648 niweht langer si ne wâren .
0,649 sie komen algeriht .
0,650 zuo des küniges gesiht .
0,651 sie brâhten silber unde golt .
0,652 unde macheten in den küninc holt .
0,653 er ne wolte ire goldes niwiht entvâhen .
0,654 er bestuont sie mit genâden .
0,655 wande si dûhten in vrûmic unde balt .
0,656 er nam ir ein tûsent in sîne gewalt .
0,657 unde vuorte sie in Egipto allesament .
0,658 unde stifte dâ ze êren sînes namen .
0,659 eine burc diu wart nâch ime genant .
0,660 der ervüere al diu lant .

0,661 er ne gesæhe niemer necheine .
0,662 diu zuo ir mohte werden gezalt .
0,663 Babilônia ne wart nie sô wît .
0,664 sô man sie noch ane sihet .
0,665 Trôja ne mohte sich ze ir niht gemâzen .
0,666 â was Gapadotia gebrach .
0,667 daz si wære alsô vast .
0,668 Pede noch Karthago .
0,669 ir newedere was sô
0,670 rîcher was disiu burc noch .
0,671 danne Rôme oder Antiochia .
0,672 Alexandria si hiez .
0,673 sînen namen er dâr inne liez
0,674 dannen er durch daz lant brach .
0,675 er tete ein michel ungemach .
0,676 er was Dariô gram .
0,677 er stôrte Galileam .
0,678 dâ wart in Neptalimlant
0,679 al verhert unde verbrant .
0,680 alsô tet er Zabulon .
0,681 die rîchen burc Naason
0,682 er zerstôrte Samariâm .
0,683 alsô tet er Zityam .
0,684 diz was dâ Naaman inne was
0,685 von der miselsuhte genas .
0,686 er zerstôrte ouch Pitaniam .
0,687 dâ Juditch Holoferne sîn houbet nam .
0,688 unde zerstôrte ouch judenisch lant .
0,689 dâr nâch wart Jerusalem verbrant .
0,690 unde Bêthlêhêm [diu] dâ bî stêt .
0,691 sô nieman mit ime streit .
0,692 al biz er Tyre zuo treip .
0,693 â waz ime dâ helede tôt beleip .
0,694 Tyre was ein stat grôz .
0,695 daz mere si alle umbevîlôz .
0,696 dâ wârn die mûre harte .
0,697 von quâderstein geworht .
0,698 mit îserînen spangen .
0,699 was al daz werc bevangen .
0,700 unde dâ zuo mortær unde blî .
0,701 wie mehte siu vester sîn .
0,702 drî wâren der mûre .
0,703 umbe waz solte si daz guot vertûren .
0,704 daz golt sie nie ne hâlen .
0,705 sie tâten die türne mâlen .
0,706 daz daz rôte golt . dâr ab schein .
0,707 gemuoset obene an den stein .
0,708 danne zwischen giengen die bogen .

0,709 si wâren al mit golde bezogen .
0,710 die türne stuonten vile nâhe .
0,711 wît was der hov dâ .
0,712 vile grôz schade
0,713 daz si Alexander zerbrach .
0,714 durch sîn übermüeticheit .
0,715 siu was einer mîle breit .
0,716 er ne weiz in anders necheine schulde .
0,717 niuwan si wâren einem künige holt .
0,718 daz was Dariôs rex persarum .
0,719 deme sie undertân wâren .
0,720 nû vernement ouch ein ander .
0,721 zuoze in sante Alexander .
0,722 unde sprach ob si in ze künige wolten schepfen .
0,723 unde ime wesen undertân .
0,724 unde die burc gæben in sîne gewalt .
0,725 dâ saz inne vile manic helt .
0,726 die alle wider ze im santen .
0,727 wande si sîn niet iht bekanten .
0,728 si sprâchen daz si in niene vorhten .
0,729 noch si sîn ze niehte bedörften .
0,730 wan sie trüegen ime willigen muot .
0,731 unde gæben ime gerne durch minne ire guot
0,732 und alsô dise boten wider kômen .
0,733 vernement wie in Alexander vernâme .
0,734 mit zorne er dâr nider saz .
0,735 bî sînen halse er sich vermaz .
0,736 er sprach sîn scholte borelange sîn .
0,737 er wolte ouch
0,738 ne weiz ich wie ire name sî .
0,739 unde sante si dâr widere in die stat .
0,740 unde [hie] den altesten sagen daz .
0,741 wâr sie ire sin tæten .
0,742 daz si den küninc versmæhten .
0,743 der Rôme mit sîner kraft .
0,744 und al Kriechen under sich hiete brâht .
0,745 und alsô die boten vüre komen .
0,746 unde die burgere ire rede vernâmen .
0,747 si tâten stolzen liuten gelîch .
0,748 unde hiengen sie alle ûf ein zwîc .
0,749 nû bevienc Alexander die burc mit here .
0,750 mit den scheffen in dem mere .
0,751 mit sturme er sie starke dwanc .
0,752 er truoc in übelen gedanc .
0,753 si werten sich vone prîse wole .
0,754 der wier ne was nechein zal .
0,755 der in der burc was .
0,756 zweinzic tûsent unde baz .

0,757 alsô vile sluogen si ime sînes hers .
0,758 daz die . ûnde des mers .
0,759 von dem bluote wurden rôr .
0,760 der wint tet in vile nôr .
0,761 daz sîner scheffe ein hundert versunken .
0,762 unde sîne helde al ertrunken .
0,763 dô Alexander daz gesach .
0,764 daz ir alsô vile tôr lac .
0,765 des sturmes hiez er abe stân .
0,766 er tete die schif wider in die habe gân .
0,767 Alexander bedâhte sich .
0,768 des schaden unmâzlich .
0,769 er was ein listic man .
0,770 grôze boume er gewan .
0,771 unde tete die zesamene spannen .
0,772 von kündigen zimbermannen .
0,773 unde hiez daz mit steinen vûllen .
0,774 daz was an sînem willen .
0,775 swanne er sîn ebenhoehe [ze] dem turne bræhte .
0,776 daz er lange boume dâr abe rihte
0,777 die dâr zuo den zinnen mahten gan .
0,778 er wolte sie mit nîde bestân .
0,779 einliv tûsent sante er sînes hers .
0,780 nâch den boumen über mer .
0,781 unde hiez die boume vellen .
0,782 er wo[l]te bervrit stellen .
0,783 ûf einen berc heizet Libanus .
0,784 dâ stêt ûf manic cedrus .
0,785 diz ist Libanus [der] in Arabîen stêt .
0,786 dâ der Jordân ûz gêt .
0,787 diz ist noch der selbe walt .
0,788 den der küninc Salomon galt
0,789 wider einen küninc der hiez Sigiram .
0,790 er gap ime halp Galileam
0,791 wande ime die boume wole gevielen .
0,792 ze zimber ze kielen .
0,793 si ne ervûlent ouch niemer mêre .
0,794 weder durch regen noch durch snê .
0,795 unde alsô Arabati daz bevunden .
0,796 die Tyren wole guotes . [gunden]
0,797 niht langer si ne entwalten .
0,798 die den forst valten .
0,799 si nâmen ein ungezogenlich pfant .
0,800 und ersluogen ein tûsent .
0,801 er nam .
0,802 des hers daz er noch dô habete .
0,803 ein herzoge hiez sich Grakto .
0,804 unde ein ander der was Perdix genant .

0,805 den bevalch er daz gesezze in die hant .
0,806 unde vuor
0,807 bewarte sîne holden .
0,808 die dâ zimberen solten .
0,809 biz iz allez gereite wart .
0,810 dô nam er die widervart .
0,811 nû was Alexander mit here .
0,812 nâch den boumen über mere .
0,813 des wurden die burgære stolz und balt .
0,814 si ranten ûz mit gewalt .
0,815 übermüeticlîche si sich râchen .
0,816 ein kastel si ime zerbrâchen .
0,817 eines morgenes vruo
0,818 mit viure giengen si ime zuo .
0,819 unde sluogen unde viengen .
0,820 alle die si dâr ûfe begiengen .
0,821 noch mac ich iu sagen mêre
0,822 si besankten sich in den sê .
0,823 daz man si in allem tage [niene] sach .
0,824 êr man die gruntveste zerbrach .
0,825 unde sankten sich in des sêwes grunt .
0,826 unde sie komen aber ûf wider gesunt .
0,827 unde alsô daz kastel was entwart .
0,828 dô huop sich ein sturm hart .
0,829 von den herzogen zwein
0,830 dô beleip der burger nie nechein .
0,831 â wie maniger des sturmes entgalt .
0,832 ze zwein hundert wâren si gezalt .
0,833 die dâ tôt beliben .
0,834 aldâ si si von den porten trîben .
0,835 dâ wart in geschadet vile sêre .
0,836 dô allrêreste kom ire hêre .
0,837 ouwê daz Tyre dô niht genas .
0,838 alsô wole ir geanegengett was .
0,839 nû wile ich sagen allen die des niene kunnen .
0,840 wie Tyre wart gewonnen .
0,841 Alexander kom mit grôzer krefte .
0,842 und tet schef zesamen heften .
0,843 iemer zwei unde zwei neben .
0,844 unde hiez den îserînen bande geben .
0,845 unde tet die mit hiuten alsô überziehen .
0,846 daz die ûnden dâr in niene giengen .
0,847 bervride dâr ûf si satzten
0,848 von den allerlengesten boumen . die sie habeten .
0,849 unde trîben si zuo den zinnen .
0,850 alsus wolten si die burc gewinnen .
0,851 der küninc hiez die mûre houwen .
0,852 mit stâlîner gezouwe .

0,853 dâ huop sich ein sturm vile grôz .
0,854 â wê man warf unde schôz .
0,855 von den einen ze den andern .
0,856 daz alle die mahte wundern
0,857 die ie decheinen sturm gesâhen .
0,858 von der werlte diu dâ tôl lac .
0,859 sô wart daz mere allez ein bluot
0,860 des wuohs dem künige wole sîn muot .
0,861 er bestuont sie mit nîde .
0,862 von den bervriden hiez er sie trîben .
0,863 die wâren hoehere danne die türne .
0,864 daz tet er in ze zorne .
0,865 dâ wurden die schoenen türne mit den bogen .
0,866 in daz wazzer gezogen .
0,867 unde brâchen dâ der bezzisten mûre eine .
0,868 die ie burc gewan . decheine .
0,869 alsô si ze der ander kômen .
0,870 zêderboume sie dâr nâmen .
0,871 unde dâr zuo lange tannen
0,872 dô hiez er bervride spannen .
0,873 unde rihte die ûf mit listen .
0,874 unde [si] satzten si ûf zuo der veste .
0,875 Alexander steic ûf daz oberest gewer .
0,876 und gebôt den sturm über al daz here .
0,877 unde liez dô mit der werlte
0,878 den erneststurm werden .
0,879 mit hemeren man die burcmûre zebrach .
0,880 â waz dâ werlte tôl belac
0,881 Alexanders schilt was helfenein .
0,882 bezzere wart nie nechein .
0,883 sîn helme was alsô guot .
0,884 sô dâr nie nechein swert durch gewuote .
0,885 in der hende truoc er einen gêre .
0,886 von golde gedræjet vile hêre
0,887 dô sach er stân . den herzen .
0,888 dem al Tyre was undertân .
0,889 gegen ime ûf der mûre .
0,890 er lie sich es niht vertûren .
0,891 er schôz in mit dem gêre durch .
0,892 unde valte in tôl in die burc .
0,893 dô tet der küninc einen sprunc .
0,894 mit ime manic helt junc
0,895 von den bervriden ûf die zinnen .
0,896 alsus wolten sie die burc gewinnen
0,897 vier tûsent ir mit ime spranc .
0,898 sie truogen übelen gedanc .
0,899 mîn wân ne triege mich .
0,900 dâ gespranc ire etelîche

0,901 dâ zestunt .
0,902 daz er niemer mêre wart [gesund] .
0,903 daz ire ein hunderet tôt lac .
0,904 âne andere ungemache .
0,905 dâ brâchen sie die bezzisten mûre zuo der erde .
0,906 diu dâr ie dechein solte werden .
0,907 dâ was daz velt vile wît .
0,908 dâ huop sich der bittereste strît .
0,909 dâ ir noch ie abe hôrtet gesagen .
0,910 dâ ne gesach man nechein zagen .
0,911 dâ mahte man manigen deggen schouwen .
0,912 al durch den helm verhouwen .
0,913 unde manigen rîtær junc .
0,914 al durch die ha[l]sberge verwunt .
0,915 daz er der wunde niht genas
0,916 wande daz swert scharpf was .
0,917 durch den schilt vlôch der gêr .
0,918 unde machete manigen helt sêr .
0,919 dâ hête jâmer ein alsô der ander .
0,920 âne der wunderlîche Alexander .
0,921 er sluoc des liutes die menige .
0,922 gebeizet was sîn brünne .
0,923 in eines wurmes bluote .
0,924 er stuont ime stolzes muotes .
0,925 hûrnîn was siu veste .
0,926 ez kom vone grôzen listen .
0,927 ich lâze tûsent und aber tûsent .
0,928 ûf der erde mahte nieman gân .
0,929 alsô vile lac ir dâ erslagen .
0,930 daz iz iu unzellic ist ze sagen .
0,931 die kûenen von Tyre .
0,932 des lebenes vile gîre .
0,933 sie vuhten alsô wildiu swîn .
0,934 swes tôt nieht solte sîn .
0,935 die umbe die burc lâgen .
0,936 si ne dorften sich des siges niemer gerüemen .
0,937 wande die burgere brâchen si durch .
0,938 unde wichen aber wider in die burc .
0,939 dâ verlôs er manigen tiuren kneht .
0,940 Alexander tet in grôz unreht .
0,941 harte zurnte sich Alexander dô .
0,942 mit nîde gienc er den porten zuo .
0,943 die dâr ûf wâren .
0,944 si tâten schaden mêre .
0,945 ûf der porte stuonden drîe türne
0,946 dâ geschiet er abe mit zorne .
0,947 des mordes des er an sînen holden gesach .
0,948 mit sînen vürsten er sprach .

0,949 "hêre bedenket iuch es inzît .
0,950 wande ire tiure knehte sît .
0,951 nement si nû den obern sige .
0,952 sô ist unser spot über daz lant ."
0,953 der rât der ime dô wart getân .
0,954 den mugent ir schiere verstên .
0,955 sie rieten daz er mange getæte rihten .
0,956 unde liezen die türne brechen .
0,957 zwâ unde sibenzic mange wurden dâ gesta[l]t .
0,958 sie wurfen alle mit gewalt .
0,959 si wâren vile wole geseilet .
0,960 si wurden in driu geteilet .
0,961 si wurfen viur unde wite .
0,962 daz was Alexanders site .
0,963 daz er kriechisch viur kunde wûrken
0,964 unde liez iz nieman merken .
0,965 von welicher liste . iz ime kom .
0,966 daz ez in dem wazzere bran .
0,967 daz warf er in zuo der burc .
0,968 dâ mite brante er siu al durch . unde durch .
0,969 unde dâr zuo manigen harten stein .
0,970 dô beleip der burgere nie enhein .
0,971 si muosen dô alle von der zinnen gân .
0,972 wande si ne getorsten dâ nie langer gestân .
0,973 vore des viures vorhten .
0,974 Alexander der dranc zuo der porte
0,975 mit nîde er sie dâr nider brach .
0,976 â waz ime dâ helede tôt lac .
0,977 des wær ime ze êren mêre geschehen .
0,978 vorhten si der mange wurfe nicht .
0,979 sô solte ime diu burc werden tiure .
0,980 gewünne er si nicht . mit kriechischen viure .
0,981 Alexander wolte sich wole rechen .
0,982 er hiez die drîe türne nider brehen .
0,983 die daz viur hiete verlâzen .
0,984 der allerrîchesten burgere . die in der burc sâzen .
0,985 der tete er driu tûsent vâhen .
0,986 unde hiez sie blenden unde hâhen .
0,987 wider sînen vûrsten drin .
0,988 die er dâ vore sante dâr in .
0,989 des siges des er dâ nam .
0,990 wær ez ein wole bedâht man .
0,991 er ne würde es niemer ze vrô .
0,992 wande ez geschach sît alsô .
0,993 daz ir mêre was der ime dâ tôt beleip .
0,994 danne dâr innerthalben Tyre wâre .
0,995 weder geste oder burgere .
0,996 al zerstoeret was . dô Tyrus .

0,997 die stifte sich der küninc Apollonius .
0,998 den Antiochus über mere jagete .
0,999 wande er ime sagete
0,1000 daz rehte an einem brieve .
0,1001 daz er mit sîner tohter sliefe .
0,1002 Tyre is noch diu selbe stat
0,1003 dâ daz heiden wîp unseren hêren . bat .
0,1004 daz er ire tohter erlôste .
0,1005 von dem übelen geiste der sie nôte .
0,1006 dâr nâch über unlanc stunt .
0,1007 sô wart Dariô kunt .
0,1008 mit einem der vone Tyr entran
0,1009 daz Alexander der küene man .
0,1010 sîne liute habete gefangen .
0,1011 unde geblendet unde erhangen .
0,1012 unde diu schoene Tyre lac in kole .
0,1013 unde er sie hieze daz laster dolen .
0,1014 er sprach er möhte sich schamen .
0,1015 sînes künincliches namen .
0,1016 daz er in niuht ze helfen kôme
0,1017 dô er ire grôze nôt vernæme .
0,1018 ein rîcher küninc was Dariôs .
0,1019 her wider dâhte er alsus .
0,1020 Alexander dûhte in lützel .
0,1021 er sante ime eines Kindes . stuzel .
0,1022 unde dâr zuo ein schuochbant .
0,1023 alsô er ez in sînem herzen vant .
0,1024 unde ein wênic goldes in einer lade
0,1025 er wânte [er] ime iemer möhte geschaden .
0,1026 unde sante ime dise drîe sache .
0,1027 unde tet des einen brieve machen .
0,1028 daz ez der brieve benante .
0,1029 umbe waz er ime die drîe gebe sante .
0,1030 ein stuzel sante er ime umbe daz .
0,1031 daz ime daz stüende michel baz [dazz]
0,1032 er mit den kinden spilen gieng .
0,1033 danne er . sîne liute quolte oder hieng
0,1034 daz bezeichnenet daz schuochbant .
0,1035 daz Alexander wart gesant .
0,1036 daz er mit tagelîchen dienen solte .
0,1037 ob Dariôs wolte .
0,1038 wande ein schuochbant nützet man tagelîche .
0,1039 daz er dâr an bedâhte sich .
0,1040 unte lieze sîn irreheit stân .
0,1041 unde wære sîneme hêren undertân .
0,1042 alsô ander sîne vorderen hêten
0,1043 die sich nie wider ime gesazten .
0,1044 daz bezeichnenet daz golt

0,1045 daz er rehte merken scholte .
0,1046 daz daz der zins wære den ime sîn vater gûlte .
0,1047 àllerjærigliche durch sîne hulde .
0,1048 daz er in des bræhte innen
0,1049 unde vuore ime den zins gewinnen .
0,1050 unde daz er des goldes solte leben .
0,1051 unde er nieman niuht solte nemen .
0,1052 unz er wider heim koeme .
0,1053 daz er nieman sînes niuht næme
0,1054 unde daz er schiere dannen rite .
0,1055 unde niuht langer bite .
0,1056 unde tæte er iuwiht mêre wider sînen willen .
0,1057 er hieze in mit dem besemen villen .
0,1058 unde alsô Alexander den brieu gelas .
0,1059 ôwî wie smæhe ime was .
0,1060 daz man ime droute ze slahen .
0,1061 die boten hiez er alle ûf hâhen .
0,1062 der boten einer ze im sprach .
0,1063 “hêrre tuot uns nechein ungemach .
0,1064 wande ez ne dûhte iuch genâde noch reht .
0,1065 swâ sô iuwer kneht .
0,1066 iuwer boteschaf tribe .
0,1067 daz er dâr umbe tôt belibe .
0,1068 unde niene schendet iuweren namen .
0,1069 wir jehen des hêrre allesamet .
0,1070 daz under disen kûningen allen .
0,1071 necheiner ze iu mac gevallen .
0,1072 der mit alsô grôzer vrûmicheit .
0,1073 sîn here über lant leite .
0,1074 sô ir hêrre kûninc tuot .
0,1075 nû bedwinget iuweren muot .
0,1076 unde habet unser mâze .
0,1077 wande wir getorsten die boteschaft niet lâzen .”
0,1078 Alexander bedâhte sich .
0,1079 er wart den boten genædic .
0,1080 er ne weiz in nieht umbe die schulde
0,1081 er gap in wider daz selbe golt .
0,1082 daz ime von ire hêren bekom .
0,1083 er sprach “â wê wie übele ich ime des gân .
0,1084 daz mir iuwer hêrre drôuwete ze slahen .
0,1085 er hât gelîche getân .
0,1086 alsô der boese rûde tuot
0,1087 des nahtes alsô er iweht verstêt .
0,1088 sô ne getar er sich dâr nâher niuht geziehen .
0,1089 er beginnet ûzwert vliehen .
0,1090 unde wîzet iz allez [mit] sîner keln
0,1091 unde beginnet darwert bellen .”
0,1092 er sprach “iuwers hêrren brieu mir niuht gevellet .

0,1093 wande er ze der gebe niene gehillet .
0,1094 diu gâbe diu ist lobelich .
0,1095 unde der brieve der ist redelich .
0,1096 er bezeichnenet alle ein ander .”
0,1097 sprach der künige Alexander .
0,1098 “[der] stuzel den mir iuwer hêrre habete gesant .
0,1099 dâ mit hât er mir erkant .
0,1100 daz allez ane mir sule bestân .
0,1101 swaz sô under deme himele is betân .
0,1102 unde ich es alles hêrre sule werden .
0,1103 ûf der schîbeligen erde .
0,1104 ein riemen den er mir sante .
0,1105 dâ [mite] er mir bekante .
0,1106 daz er sich mir ze eigene welle geben .
0,1107 und in iht mînen genâden iemer welle leben .
0,1108 daz er mîn dienest welle sîn .
0,1109 ze allen herverten mîn .
0,1110 daz golt daz ir mir habet brâht .
0,1111 dâ mit habet ir mir gesaget .
0,1112 dâ ich mir al einem wole gezeme .
0,1113 daz ich den zins von ime neme .
0,1114 unde dâr zuo von allen landen .
0,1115 unde bedwinge die ze mînen handen .”
0,1116 diz satzte man dô allez an einen brieve .
0,1117 daz was dem künige Alexander lieb .
0,1118 er schreip in selbe mit sîner hant .
0,1119 er wart dem künige Dariô gesant .
0,1120 er entbôt im ouch dâ mite
0,1121 daz er doch drîe mânôde bite .
0,1122 er sprach er ne wolte niuht langer lengen .
0,1123 zehenzic tûsent wolte er bringen .
0,1124 über wazzer Eufrates .
0,1125 niwîht gedenket er des .
0,1126 ze Babilônîe vûre die grôze stat .
0,1127 alsus wart an den brieve gesâtzet .
0,1128 alsô lange sô er des zinses nieht ne wolte entbern .
0,1129 er solte sîn dâ heime wern .
0,1130 mit alsô getâner mâze .
0,1131 er solte ime sîn houbet lâzen .
0,1132 unde ob er daz tagedinc lieze .
0,1133 daz [er] niemer küninc gehieze .
0,1134 er bestüende daz volcwîc .
0,1135 Dariôs was ein küninc rîche .
0,1136 unde alsô der brieve vûre in kom .
0,1137 vreislich er in vernam .
0,1138 mit zorne er ûf vuor .
0,1139 mit sînem rîche er swuor .
0,1140 er sprach “daz mich ie der beschalt

0,1141 des vater mir den zins galt .
0,1142 ich sal ez an die kêren .
0,1143 iz ne ergêt ime niemer ze êren .”
0,1144 er sprach noch ouch niemer guot ende genæme .
0,1145 daz er ie durch sîn laster ûz kome .
0,1146 Darius sante einen brief
0,1147 zwein herzogen die wâren ime lieb .
0,1148 unde bat daz si Alexander . diu schef besperten .
0,1149 unde sîn werten .
0,1150 unde daz si in wider stiezen .
0,1151 unde sie [in] über daz wazzer niene liezen .
0,1152 über daz wazzer Eufates .
0,1153 daz was Marios unde Typotes .
0,1154 daz [si] in selben satzten . dâr nider .
0,1155 unde in bunden alsô ein wider .
0,1156 daz si ir manheit gedæhten .
0,1157 daz si [in] ime lebentigen bræhten .
0,1158 er sprach wie gerne er ime helfen solte .
0,1159 ze allen den êren er wolte
0,1160 der hôheste sîn ûf der erde .
0,1161 unde muoste daz an einem galgen werden .
0,1162 dô sprâchen die zwêne herzogen .
0,1163 “unser hêrre ist vile sêre betrogen .
0,1164 daz er uns den man heizet vâhen .
0,1165 dem alliu lant sint undertân .
0,1166 unde die vürsten habent gefangen .
0,1167 unde sîn wille ist ergangen .
0,1168 über Jerusalem unde über Tyre .
0,1169 sîn selbes ist er gîre .
0,1170 Rôme und Egiptenlant .
0,1171 stênt beidiu in sîner hant .
0,1172 Karthago diu rîche burc .
0,1173 mit gewalte reit er dâ durch .
0,1174 unde hât manige guote burc zestôrt .
0,1175 die unseren hêrren ane hoerent .
0,1176 unde unser hêrre hât iz allez versezzen .
0,1177 der küninc Alexander hât sich noch eines mêren vermezzen .
0,1178 daz er in mit sînem eigeneme lande vâhe .
0,1179 mit grôzem urluige bestâ”
0,1180 si sprâchen “unser hêrre handel iz noch mit sinne .
0,1181 ich wæne er es michel schande gewinne .”
0,1182 unde alsô der bote widerkom .
0,1183 unde Dariôs der zweier herzogen rede vernam .
0,1184 sêre zurnte er sich des
0,1185 dô nam er einen herzogen der hiez sich Mennes .
0,1186 unde dâr zuo tûsent man .
0,1187 die er alle über naht gewan
0,1188 unde sante si Alexander gegen .

0,1189 unde hiez den zwein herzogen sagen .
0,1190 liezen si in über daz wazzer varen
0,1191 ez solte in iemer mêre schaden .
0,1192 si ne gewünnen sîn niemer vrume .
0,1193 noch si ne getorsten niemer vüre sîne ougen komen .
0,1194 er sprach würde Alexanders wille geendet .
0,1195 sie wurden alle dâr mite geschendet .
0,1196 die zwêne herzogen getorsten niuht lâzen .
0,1197 alle dâ ire man sâzen .
0,1198 si santen algerihtē
0,1199 über allez ire gerihtē .
0,1200 die sie zesamene brâhten .
0,1201 ze zehen tûsent mahte man sie ahten .
0,1202 unde drîzic tûsent dâr zuo .
0,1203 er hâte einen übermüeten muot .
0,1204 er schiffete sich zevorderest über die vluot .
0,1205 an eineme stade kômen si ime engegen .
0,1206 alsus hôrte ich meister Alberîchen sagen .
0,1207 dâ huop sich ein sturm vile grôz .
0,1208 ein tûsent beleip ime dâ tôt .
0,1209 von kriechischen künne .
0,1210 êr Alexander den vurt ie gewünne .
0,1211 dô kom Alexander selbe geriten .
0,1212 alsô er es vile kûme habete gebiten .
0,1213 ûf Buzival er reit .
0,1214 dô sluoc er alsô der doner
0,1215 vore dem sich nieman mac bewarn .
0,1216 swer [in] von verre sach gevaren .
0,1217 êr er hinder sich gesach .
0,1218 sô hête er sîn einen slac .
0,1219 daz er sîn bluot allez spê .
0,1220 unde lebete ouch dâr nâch nicht mêre .
0,1221 sîn schaft was mære grôz .
0,1222 swem wart ein slac oder ein stôz .
0,1223 der was des gewissen tôdes .
0,1224 unde er ne beiz dâr nâch niemer brôtes .
0,1225 Mennes was ein herzoge genant .
0,1226 den Dariôs hête dar gesant .
0,1227 der was ein helt vrûmiclich .
0,1228 ein hundert rîtær hâte er umbe sich .
0,1229 mit swerten vile guoten .
0,1230 die tâten si im ze huote .
0,1231 ze ime mahte nieman brechen .
0,1232 wan der des lebenes wolte vergezzen .
0,1233 Alexander wande sîn vane
0,1234 er begunde sîne heledē manen .
0,1235 er sprengete ze Mennes wert .
0,1236 unde liez iz niuht durch die scharpfen swert .

0,1237 durch alle die sîne er brach .
0,1238 Mennes er durch den schilt stach .
0,1239 daz daz bluot begunde rinnen .
0,1240 Mennes stach hine wider durch den sînen .
0,1241 der was veste helfenbeine .
0,1242 daz daz bluot an dem spere schein .
0,1243 ir iewedere stach den anderen nider .
0,1244 aldâ grifen si ze den swerten sider .
0,1245 â wie daz viur dâr ûz spranc .
0,1246 dâ ein stahel wider den ander dranc .
0,1247 grôzer slege wurden nie getân .
0,1248 sie ne slüege wîlen Samson .
0,1249 der die grôzen maht an ime truoc .
0,1250 daz er mit eines eseles backen ein tûsent liutes ersluoc .
0,1251 â wie mahte daz ie werden .
0,1252 Mennes der sluoc Alexandern zuo der erde .
0,1253 aldâ wart ime der helm ab gebrochen .
0,1254 der mânigen grôzer slege
0,1255 der der küninc Alexander vienc .
0,1256 unde wær er alsô wole gewâfenet nicht .
0,1257 er ne beschouwete niemer daz tages licht .
0,1258 wane daz sînes tôdes noch niwiht solte sîn .
0,1259 ein rîtær der hiez Daclym .
0,1260 der was mit Alexander dâ .
0,1261 unde stuont ime des tages vile nâhe .
0,1262 der ander hiez Jubal .
0,1263 der sich vile ungerne in dem sturme hal .
0,1264 der was dar komen mit deme herzogen .
0,1265 unde hiete daz swert erzogen .
0,1266 unde wolte Alexander geben einen slac .
0,1267 dâ er ime den hals blôz gesach .
0,1268 Daclym wart dâr êrer .
0,1269 er lôste sînen hêrren .
0,1270 er sluoc Jubal von oberest sîner zende .
0,1271 al nider durch die lende .
0,1272 unde machete zwêne halbe man .
0,1273 â wie guot einen lop daz swert gewan .
0,1274 Daclym den helm gebranc .
0,1275 sînem hêrren . er in ûf daz houbet bant .
0,1276 sîn houbet was im erschellet .
0,1277 dâ er dâr nider wart gevellet .
0,1278 niweht verwielt er sich sîner rede .
0,1279 er was in grôzer unhûge .
0,1280 er warf sich umbe alsô ein helet .
0,1281 “nû wert iuch hêrre küninc .”
0,1282 alsus sprach sîn rîtær Daclym .
0,1283 “hiute sî iuwer ellen schîn .
0,1284 wande ir ein tiure kneht sît .

0,1285 nû zîhet swert des ist zît .”
0,1286 unde Alexander wart lôs .
0,1287 dô spranc er ûf sîn ros .
0,1288 sîn ougen wâren vreislich
0,1289 sîne vîende ervorhten sich .
0,1290 unde alsô er ze im selben kom .
0,1291 Buzival er mit den sporen nam .
0,1292 er tete Daclyme danc .
0,1293 unde vrumete manigen swertslac .
0,1294 under die menige er reit .
0,1295 alsô der daz gras . nider slehet .
0,1296 sô ströuwete Alexander
0,1297 diz ne mohte nechein ander .
0,1298 diu menige diu was mæregrôz .
0,1299 die der hêrre sluoc unde schôz .
0,1300 alsô vile lac ir dâ erslagen .
0,1301 daz iu unzallich wære ze sagene .
0,1302 Persen unde Kriechen .
0,1303 âne wunden unde âne siechen .
0,1304 man saget von dem sturme der ûf Wolvenwerde geschach .
0,1305 dâ Hiltén vater tât lac .
0,1306 zwischen Hagenen unde Waten .
0,1307 sô ne mohte er her zuo nieht gaten .
0,1308 iedoch ne mohte nechein sîn .
0,1309 noch Herewîc noch Wolvwîn .
0,1310 der dâr ie gevaht volcwîc
0,1311 dem künige Alexander gelîch .
0,1312 man liset von guoten knechten .
0,1313 die wole getorsten vehten
0,1314 in Trôjare lide .
0,1315 êr sich der sturm geschiede .
0,1316 Achilles unde Hektor .
0,1317 Parîs unde Nestor .
0,1318 die manic tûsent ersluogen
0,1319 unde die ouch scharpfê gêre truogen .
0,1320 sô mohte under in allen
0,1321 zuo Alexander niuht gevallen .
0,1322 Pincun was ein grâve genant .
0,1323 der vuorte den vanen an der hant .
0,1324 den er Alexander abe brach .
0,1325 den Mennes dâr nider stach .
0,1326 unde alsô er den grâven hâte erkoren .
0,1327 dô ruorte er daz ros mit den sporen .
0,1328 zuo dem grâven er reit .
0,1329 er sprach “daz [was] ein michel kintheit .
0,1330 daz mîn vane kom in iuwer hant .
0,1331 iz wirt iu ze laster gewant .”
0,1332 der grâve daz ros umbe warf .

0,1333 â wie schier er dâ erstarp .
0,1334 er sprach "gewisse vûer ich einen vanen .
0,1335 der kurze wîle mit mir sol wonen .
0,1336 ich sol dir in alsô wider gebent .
0,1337 daz ez dir gât an dîn leben ."
0,1338 mitsamet deme worte .
0,1339 sô stach er in mit dem orte .
0,1340 daz an dem spere was .
0,1341 daz er der wunden wole genas .
0,1342 oberhalben der brâ .
0,1343 dâ was der stich getân .
0,1344 nû vernement waz Alexander sprach .
0,1345 alsô in Pincun gestach .
0,1346 dû solt lügenære wesen .
0,1347 unde ich sol des stiches wole genesen .
0,1348 mit dem selben worte .
0,1349 gap er ime [einen] [slag] mit dem swerte .
0,1350 ûf daz houbet er in sluoc .
0,1351 durch den hals unde durch den huot .
0,1352 der slac was unsüeze .
0,1353 daz houbet viel ime vûre die vuoze .
0,1354 unde Alexander sînen vanen wider gewan .
0,1355 Mennes aber ime zuo kom .
0,1356 den herzogen er dâr nider stach .
0,1357 dô gap er ime mit dem swerte einen slac .
0,1358 ûf den arm er in sluoc .
0,1359 dâ er daz swert inne truoc .
0,1360 der slac was vone grôzer maht .
0,1361 durch den arm unde durch den schaft .
0,1362 sô kom daz swert . gedrungen .
0,1363 unde want ime an der lungen
0,1364 aldâ viel Mennes dâ nider .
0,1365 Persi ne vuhten niuht sider .
0,1366 ûzer dem velde si vluchen .
0,1367 si ne getorsten in selben nieht getrûwen .
0,1368 des wart Alexander vile balt .
0,1369 er beleip dâ mit gewalt .
0,1370 zuo den selben stunten .
0,1371 al biz ime geheilten sîne wunden .
0,1372 unde genâhete sich Dariô baz .
0,1373 eine burc er ime besaz .
0,1374 diu was Sardix genant .
0,1375 von sînen wart siu verbrant .
0,1376 dô nam er silber unde golt
0,1377 er machete ime manigen degen holt .
0,1378 diu selbe burc Sardix .
0,1379 von ir saget uns daz buoch apokalipsis .
0,1380 daz si der siben bûrge einiu [wære]

0,1381 die got unser heilær wære .
0,1382 in sînem oberesten himel nante .
0,1383 dô er sante Johannes dâr ze boten sante .
0,1384 unde daz man Dariô diz gesagete .
0,1385 niuht sêre er ne klagete .
0,1386 er tete alsô der stolze man tet .
0,1387 der durch sîne übermuot .
0,1388 sich sô verrer verwellet .
0,1389 daz er vüre sînen argeren vellet .
0,1390 unde er sich niuht warnet enzît .
0,1391 ouwê wie dicke er laster gesihet
0,1392 iedoch sô swuor er ein teil .
0,1393 er sprach sô hülfe ime sînes rîches heil
0,1394 iz ne scholten niemer vierzehen nahte entegân .
0,1395 er solte Alexander ûf einen boum hâhen .
0,1396 daz in daz gevügel æze .
0,1397 des er sich ie wider in vermæze .
0,1398 dannen wurden sîne boten gesant .
0,1399 über wazzer unde über lant .
0,1400 unde [er] hiez sînen vürsten daz sagen .
0,1401 unde manigem rîchen künige klagen .
0,1402 herzogen unde grâven .
0,1403 daz si es ime rât . gæben .
0,1404 unde komen mit sô vrumen knehten .
0,1405 die wole getorsten vehten .
0,1406 mit allen ire menigen .
0,1407 in daz velt Mesopotamiam .
0,1408 in der breiten ouwen .
0,1409 dâ wolte er sîn her beschouwen
0,1410 er sprach â wie gerne er vernæme
0,1411 die manigen schar die ime koeme .
0,1412 nû wile ich iu kunden überal .
0,1413 wie vile ein schare haben sal .
0,1414 allen den . die des niuht en wizzen .
0,1415 sehs tûsent unde [sehs] hunderet sechzig .
0,1416 des wile ich .
0,1417 die vürsten wile ich zelen .
0,1418 unde die menige diu mitsament in kom .
0,1419 alsô Dariô wole gezam .
0,1420 wande er dê gewaltigeste küninc was .
0,1421 dâ man von ie gelas .
0,1422 vile wîten gienc sîn gewalt .
0,1423 zwêne unde drîzic wâren sie gezalt .
0,1424 die künige die ze im kômen .
0,1425 dô si sîne nôt vernâmen .
0,1426 grâven komen ime ouch .
0,1427 zwei hundert unde sibenzic .
0,1428 herzogen ze ime kêrten .

0,1429 daz sich sîne rîtar mêreten
0,1430 die zalte man sô ich sicher bin .
0,1431 ze ahte hundert unde drîn .
0,1432 von Persen wurden ime gesant .
0,1433 helede sibenzic tûsent .
0,1434 wole hulpen ime des .
0,1435 die küenen Zinnonenses .
0,1436 si kômen mit vûnvzic tûsent knehten
0,1437 die wole getorsten vehten .
0,1438 die Panfilîen tâten harte wole .
0,1439 si brâhten die selben zal
0,1440 noch dô kom ime ein schar grôz
0,1441 die des wîges lützel bedrôz .
0,1442 alsô si in küniges reise wole gezam .
0,1443 wande si von Medinrîche quam .
0,1444 Medinrîche ist noch daz selbe lant .
0,1445 dâr der engel mit Tobias wart gesant .
0,1446 Kilikien heizet ein lant .
0,1447 si brâhten ime ahtzic tûsent .
0,1448 von Ninivê wurden ime gesant .
0,1449 ein unde zweinzic tûsent .
0,1450 die ûzer Armenîenlant .
0,1451 si brâhten ime ahte tûsent .
0,1452 si ne mohten ouch dô nieht baz .
0,1453 diz was dâ diu arke gesaz .
0,1454 diu ûf dem wazzzer swebete .
0,1455 dâ Nôê inne lebete .
0,1456 ime santen die von Gâze .
0,1457 die über Philisteren sâzen .
0,1458 di ime wole ze trôste mohten wesen .
0,1459 zwirent vûnv hunderet starker risen .
0,1460 noch dô sâzen sîne vrîe man .
0,1461 verre über Phrygiam .
0,1462 die truogen ime guoten willen .
0,1463 si nâmen zweinzic tûsent gesellen .
0,1464 unde tâten ze im kêren .
0,1465 si gunden ime sîner êren .
0,1466 alsô man sînen willen vernam .
0,1467 verre über Indiam .
0,1468 zweliv tûsent si nâmen .
0,1469 gereitclîchen ze ime kômen .
0,1470 noch dô kom ime ein wênic here .
0,1471 daz santen ime die von dem rôten mere .
0,1472 ein tûsent sneller helede .
0,1473 ze wîge wole erwelte .
0,1474 nû vernement wâr zuo man diz her nam .
0,1475 dô iz al zesamene kom .
0,1476 ze sehs hunderet tûsent wâren si gezalt .

0,1477 dâ was der hov manicvalt .
0,1478 unde dâr zuo drîzic tûsent .
0,1479 alsus hête sich Darius besant .
0,1480 unde alsô diz Alexander vernam .
0,1481 er manete sîne getriuwe man .
0,1482 die ime ze sîner noete .
0,1483 ie wâren einmuote .
0,1484 mit einer minner menige .
0,1485 sô reit er in zegegene
0,1486 ze Mesopotamia .
0,1487 dâ kômen sie zesamene .
0,1488 in der breiten ouwe .
0,1489 [man] mahte nie beschouwen .
0,1490 schar alsô edele .
0,1491 vore eineme kûninge .
0,1492 die dâr ie zesamene kômen
0,1493 unde sô grôzen schaden genâmen .
0,1494 alle die volcwîc
0,1495 von Darios zît die
0,1496 alle biz her sint geschehen .
0,1497 si ne mohten dâr zuo gelîchen nieuht .
0,1498 dâ was daz velt vile breit .
0,1499 mit den tôten überspreit .
0,1500 dâ Alexander durch daz wale brach .
0,1501 â was dâ helede tât lac .
0,1502 unde alsô êrhin muoz [izz] nû alsô ergân .
0,1503 “ir sulet den zins hier entwâhen .
0,1504 dâ ir vile manigen tac habet nâch gesant .
0,1505 den hân ich iu brâht in diz lant .”
0,1506 mit dem selben worte .
0,1507 sô gap er ime mit dem swerte .
0,1508 einen slac der was mæregrôz .
0,1509 daz ime daz houbet vûre daz marc schôz .
0,1510 dâ geschiet sich daz volcwîc .
0,1511 sus saget uns meister Alprîch
0,1512 und der guote pfafe Lambrecht
0,1513 diz licht ist wâr unde reht .
0,1514 hier dûhte siu beide diu mâze
0,1515 nû ist zît daz lâzen .